

**UNIVERZITET U SARAJEVU
MAŠINSKI FAKULTET SARAJEVO**

**P R A V I L N I K
O DISCIPLINSKOJ I MATERIJALNOJ
ODGOVORNOSTI STUDENATA NA MAŠINSKOM
FAKULTETU SARAJEVO**

Na osnovu člana 84. i 124. Zakona o visokom obrazovanju – Prečišćeni tekst („Službene novine Kantona Sarajevo“ broj: 43/13) i člana 92., 139. i 140. Statuta Univerziteta, Vijeće Mašinskog fakulteta Sarajevo, na sjednici održanoj 24.12.2015. godine, usvojio je

P R A V I L N I K

O DISCIPLINSKOJ I MATERIJALNOJ ODGOVORNOSTI STUDENATA NA MAŠINSKOM FAKULTETU SARAJEVO

I OPŠTE ODREDBE

Član 1.

Ovim Pravilnikom reguliše se disciplinska i materijalna odgovornost studenata na Mašinskom fakultetu Sarajevo (u daljem tekstu: Pravilnik i Fakultet), a naročito: povreda obaveza (discipline) studenata, disciplinske mjere i naknada štete, pokretanje i provođenje postupka utvrđivanja odgovornosti, rokovi, evidencije i druga relevantna pitanja.

Član 2.

Odgovornost iz ovog Pravilnika, može biti:

- disciplinska, uslijed povrede obaveze (discipline) studenata, i
- materijalna (naknada štete), kada je šteta prouzrokovana.

Odgovornost iz stava (1) ovog člana temelji se na krivici učinioca (subjektivna odgovornost).

Član 3.

Postupak utvrđivanja odgovornosti je hitan.

Član 4.

Stručno-tehničke i administrativne poslove vezane za disciplinsku odgovornost i prouzrokovanje štete od strane studenata obavlja Služba za pravne i opšte poslove Fakulteta.

II DOMEN PRIMJENE PRAVILNIKA

Lice sa statusom studenata

Član 5.

Pravilnik se primjenjuje na fizičko lice koje na Fakultetu ima status:

- redovnog studenta dodiplomskog studija,
- apsolventa na dodiplomskom studiju, za vrijeme dok mu traje apsolventski status,
- redovnog studenta na prvom, drugom i trećem ciklusu studija,
- studenta na postdiplomskom studiju.

III POVREDA OBAVEZA/DISCIPLINE STUDENATA

1. Opšta pozivanja na povredu obaveza/discipline

Član 6.

Student se može pozvati na odgovornost u slučaju prekršaja (povrede) pravila koja su utvrđena Zakonom o visokom obrazovanju Kantona Sarajevo, Statutom Univerziteta u Sarajevu, odlukama organa upravljanja i odlukama Vijeća Fakulteta.

2. Povrede obaveza/discipline studenata

Član 7.

Disciplinska odgovornost studenta je odgovornost za povrede obaveza u vezi sa studiranjem kao i odgovornost zbog narušavanja ugleda Univerziteta i Fakulteta.

Nepoštivanjem utvrđenih obaveza u vezi sa studiranjem, neizvršavanjem nastavnih i drugih obaveza ili nepriličnim ponašanjem student može učiniti teže i lakše povrede studentske discipline ili discipline ponašanja.

Teže povrede obaveza su naročito:

- krivotvorenje isprava u vezi sa studijem i ostvarivanjem studentskih prava,
- prezentiranje tuđeg rada kao svog, krivo predstavljanje, prisustvovanje provjeri znanja u ime druge osobe,
- nedozvoljeni pristup informacionom sistemu Univerziteta i Fakulteta ili službenim prostorijama,
- namjerno uzrokovanje materijalne štete Fakultetu,
- neprilično ponašanje u prostorijama Fakulteta ili na drugim mjestima gdje se izvodi nastava (izazivanje nereda, tučnjave ili sudjelovanje u neredu ili tučnjavi),
- učestalo ponavljanje lakših povreda,
- druga djela kojima se grubo narušava uzgled Univerziteta i Fakulteta.

Lakše povrede obaveza su naročito:

- ometanje bilo kojeg oblika nastave,
- upotreba nedozvoljenih pomagala na provjerama znanja,
- neprimjereno ponašanje prema nastavnicima, saradnicima i drugim uposlenicima Fakulteta, kolegama studentima,
- druga neprihvatljiva ponašanja (intoksikacija alkoholom ili drugim sredstvima, nepoštivanje odluke o zabrani pušenja i dr.)

3. Svojstvo u izvršenju povrede obaveze/discipline

Član 8.

Povredu obaveze/discipline student može učiniti u svojstvu:

- izvršioca ili saizvršioca (više lica),
- podstrekača,
- pomagača, i
- prikriivača.

Svojstvo i stepen krivice (krivnje) u izvršenju povrede obaveze utvrđuju se u postupku.

4. Mjesto izvršenja povreda obaveze/discipline

Član 9.

Povreda obaveze/discipline može biti učinjena:

- u bilo kojoj prostoriji u zgradi ili zgradama Fakulteta ili u neposrednoj blizini zgrade Fakulteta,
- na svakom drugom mjestu, ako se preduzetim radnjama narušava ugled Fakulteta, drugog studenta ili studenata, nastavnika i saradnika ili nekog iz nenastavnog osoblja Fakulteta (npr. iznošenje neistinitih informacija, podataka),
- na svakom drugom mjestu, ako se preduzetim radnjama namjeravalo steći neko pravo na protupravan način ili protupravna imovinska korist (npr. falsifikovanje javne isprave koju izdaje Fakultet).

5. Vrijeme izvršenja povrede obaveze/discipline

Član 10.

Povreda obaveze/discipline učinjena je u periodu dok lice ima status studenta.

6. Primjena pravila na prouzrokovanje štete

Član 11.

Pravila ovog Pravilnika shodno se primjenjuju i na slučajevne prouzrokovanja štete.

IV DISCIPLINSKE MJERE I NAKNADE ŠTETE

1. Disciplinske mjere

Član 12.

Disciplinske mjere za povredu obaveza/discipline su:

- opomena,
- opomena pred isključenje,
- isključenje sa Fakulteta u trajanju do godinu dana i
- trajno isključenje sa studija.

2. Princip prilikom izricanja mjere

Član 13.

Prilikom izricanja mjere uzimaju se u obzir, naročito: motivi iz kojih je povreda obaveza/discipline učinjena, posljedice koje je izazvala povreda, način izvršenja povreda obaveza, ranije ponašanje studenta, kao i njegovo ponašanje poslije učinjene povrede obaveza/discipline.

3. Naknada štete

Član 14.

Odgovornost iz osnova prouzrokovanja štete postoji, ako je radnja učinjena namjerno ili iz krajnje nepažnje.

Naknada prouzrokovane štete obuhvata prostu (stvarnu) štetu u visini stvarnog oštećenja, uključujući i odgovarajuće troškove.

Član 15.

Odlukom o izricanju disciplinske mjere određuje se i iznos naknade štete, ako je šteta prouzrokovana.

V POSTUPAK ZA UTVRĐIVANJE POVREDE OBAVEZE/DISCIPLINE I NAKNADE ŠTETE

1. Prijava

Član 16.

Prijavu o učinjenoj povredi obaveze/discipline i prouzrokovanju štete, kada je došao do saznanja može podnijeti:

- prodekan za nastavu,
- nastavnik,
- svaki zaposlenik,
- svaki student,
- svako lice koje je angažovano na Fakultetu.

Prijava se podnosi pismeno i sadrži naročito:

- ime i prezime studenta ili studenata koji su učinili povredu obaveza ili prouzrokovali štetu,
- njihovu bližu identifikaciju,
- opis radnje kojom je učinjena povreda obaveza/discipline ili prouzrokovana šteta uz navođenje mjesta, vremena i načina izvršenja, i
- dokaze (javnu ispravu, svjedoka, druge dokaze).

Prijava se podnosi dekanu.

Prijavu o učinjenoj povredi obaveze/discipline i prouzrokovanju štete može podnijeti dekan.

2. Pokretanje postupka

Član 17.

Postupak za utvrđivanje odgovornosti pokreće dekan, svojom odlukom u formi pismenog rješenja.

Rješenje dekana o pokretanju postupka za utvrđivanje odgovornosti obavezno sadrži podatke o licu i radnji koju je učinio sa dokazima.

Rješenje o pokretanju postupka lično se uručuje studentu putem protokola Fakulteta.

3. Rokovi

Član 18.

Postupak za utvrđivanje odgovornosti studenta za učinjene povrede obaveza/discipline i prouzrokovanu štetu, ne može se pokrenuti niti voditi:

- nakon isteka 6 (šest) mjeseci od dana saznanja za povredu obaveze i počinioca,
- nakon isteka godine dana od dana kada je povreda obaveze učinjena.

4. Disciplinska komisija i vođenje postupka

Član 19.

Organ za utvrđivanje odgovornosti studenata i za izricanje mjera za teže povrede studentske discipline je Komisija za disciplinsku odgovornost studenta (u daljem tekstu: Komisija).

Disciplinske mjere za lakše povrede studentske discipline izriče dekan.

Član 20.

Komisija ima predsjednika i dva člana. Predsjednika i jednog člana Komisije imenuje dekan iz reda nastavnika ili saradnika, a jednog člana iz reda studenata. Predstavnik studenata imenuje se na prijedlog asocijacije studenata Fakulteta.

Mandat Komisije traje jednu akademsku godinu.

Član 21.

Predsjednik Disciplinske komisije zakazuje raspravu za utvrđivanje odgovornosti za povredu obaveze/discipline i prouzrokovanu štetu.

Raspava se zakazuje u prostorijama Fakulteta u toku radnog vremena.

Na raspravu se poziva student protiv koga je pokrenut postupak i drugo lice čije je prisustvo neophodno.

Pismeni poziv za raspravu uručuje se studentu putem protokola Fakulteta.

Član 22.

Usmenu raspravu vodi predsjednik Komisije.

Rasprava se održava u prostorijama, na dan i u vrijeme kako je utvrđeno u pozivu za raspravu.

Rasprava se ne može održati, ako studentu protiv koga se vodi postupak, poziv za raspravu nije uredno uručen.

Usmena rasprava se odvija prema sljedećem redoslijedu:

- konstatovanjem prisustva pozvanih lica i utvrđivanjem njihovog svojstva (lice protiv koga se vodi postupak, svjedok, vještak, zapisničar i dr.),
- čitanjem rješenja iz člana 17. stav (2) ovog Pravilnika,
- davanjem izjave od strane studenta protiv koga se vodi postupak,
- provođenjem dokaznog postupka: uvidom u javne isprave, saslušanjem svjedoka, uvidom u odgovarajuće evidencije koje se vode na Fakultetu, saslušanjem vještaka i dr.,
- davanjem završnih izjava studenta protiv koga se vodi postupak.

Rasprava se odvija postavljanjem pitanja i davanjem odgovora (kontradiktornost postupka).

Ako se rasprava ne može završiti na jednom sastanku, zakazuje se novi sastanak, najkasnije za 15 dana.

Član 23.

Na raspravi se vodi zapisnik u koji se unose svi relevantni podaci vezani za rok rasprave.

Zapisnik vodi lice koje odredi predsjednik Komisije.

Član 24.

Odlukom, kojom se odlučuje o disciplinskoj mjeri i naknadi štete, donosi se u formi pisanog rješenja. Odluku o disciplinskoj odgovornosti Komisija je dužna donijeti najkasnije u roku od dva mjeseca računajući od dana pokretanja postupka.

Odluka iz stava (1) ovog člana sadrži, naročito:

- ime i prezime studenta protiv koga se izriče mjera i podaci o njegovoj identifikaciji,
- opis učinjene radnje, mjesto, vrijeme i način izvršenja,
- vrsta disciplinske mjere i iznos naknade štete, ako je student proglašen krivim,
- obrazloženje rješenja,
- pouku o pravnom lijeku i rok za podnošenje žalbe.

Ako je student oslobođen od odgovornosti ili je postupak o utvđivanju odgovornosti obustavljen, u dispozitivu rješenja se navodi izreka o tome uz sve ostale elemente.

Odluka iz stava (1) ovog člana uručuje se lično studentu putem protokola Fakulteta, ako je to moguće, u protivnom, primijenit će se odredbe Zakona o upravnom postupku.

Član 25.

Protiv odluke Komisije student može, uložiti žalbu Vijeću Fakulteta kao drugostepenom organu.

Žalba se ulaže u roku od 15 dana, računajući od dana prijema prvostepene odluke.

Odluka Vijeća je konačna. Vijeće može prvostepenu odluku potvrditi ili preinačiti ili poništiti, u cijelosti ili djelimično.

Član 26.

O izrečenim disciplinskim mjerama za teže povrede obaveza i naknadi štete trajno se pohranjuju u studentskom dosjeu.

VI PRELAZNE I ZAVRŠNE ODREDBE

Član 27.

Ovaj Pravilnik stupa na snagu danom donošenja. Pravilnik će se objaviti na oglasnoj ploči i web stranici Fakulteta.

Izmjene i dopune Pravilnika vrše se na način i po postupku predviđenom za njegovo donošenje.

Tumačenje Pravilnika i pojedinih njegovih odredbi vrši Vijeće Fakulteta.

V I J E Ć E
D e k a n

Prof.dr. Izet Bijelonja